

Sermon para iti Holy Thursday

“ARAMIDENYO DAYTOY KAS PANGLAGLAGIPYO KANIAK”¹

Bishop Joseph G. Agpaoa

TESKSTO: Lucas 22: 14-23; I Cor. 11: 23-26

INTRODUCTION:

Kablaaw iti nagan ni Apotayo a Jesu-Cristo!

Kakabsat, ti Nasantuan a Kumunion ket isu ti maysa kadagiti dua a sakramento ti Iglasiatayo. Kas UCCP, intay’ patien a daytoy a sakramento ket wagas ti grasia ti Dios, ket babaen iti daytoy, intayo masarakan ti naespirituan a presensia ni Cristo. Ti adatna, isu met daytoy a sakramento ti paggaangatan dagiti dadduma a sekta. Agsusupadi ngamin iti pannakaawatda iti daytoy. Dida pay agkakasurotan no kasano ken kaano ti inda panangiyaramid.

Ti maysa nga isyu ita ket no kasano iti intayo panagkumunion kas ub-obserbarentayo iti Physical Distancing. Ti Council of Bishops ken the Faith and Order Commission-tayo, nangibingayda kadatayo iti tallo nga options: Umuna, mabalin a saantayo pay laeng nga ar-aramiden. Aramidentayonto laengen no “normal” ti situasientayo. Maikadua, aramidentayo babaen iti Agape Meal. Daytoy a wagas ket isu ti inar-aramid dagiti imun-una a Kristiano idi kas koma ti Iglesia ti Corinto. Maikatlo ket aramiden ababaen iti Social media. Adda idia UCCP website-tayo ti detalyado a pannakailawag dagitoy nga options.

Ti naibasa manipud iti Lucas, inna saritaen a daydi a panangrabii da Jesus ken dagiti 12 nga adalanna ket isun ti naudi a panaglalanglang dagitoy sakbay ti pannakapapatay ni Jesus. Iti tradision dagiti Judeo, isu daydin ti selebrasionada iti piesta ti Paskua.

No amirisentayo, makita a napnuan iti emosion ti nakuna a panaglalanglang. Ngamin, iti sanguanan dagiti Adalanna, imbaga manen ni Jesus ti umadanin a panagsagaba ken ipapatayna (Lucas 22:15, 22). “Manen” kunatayo ta naibagbagana daytoy idin kadakuada. Maysa pay, imbulgar ni Jesus a maysanto kadagiti Adalanna ti mangliput kenkuana (Lucas 22: 21). Iti kasta a situasion, rimsua laketdi ti nagduduma a rikna kadagiti Adalan. Mabalin nakarikhada iti buteng, danag, ladingit, pannakariribuk, unget ken pannakatikaw. Diak la ammon no naimasda pay ti nangan.

BODY:

Nupay adu dagiti leksion a mabalin a mapidut kadagiti tekstotayo, Daytoy maysa kadagitoy nga isu nga innak ibingay, ket patiek a mangted ti dakkel a karit kadatayo ita, kas sangsanguentayo ti krisis nga inyeg ni COVID-19.

¹ 1 Cor. 12: 24, 25

1. Ti pananglaglagip ken ni Jesus ket maysa a pammalagip kadatayo tapno intay' aramiden ti umiso a wagas ti biag nga inlungalongna.

Ti tekstotayo iparangarangna no apay a dagiti namati ket ar-aramidenda ti panaglak-am iti tinapay ken kopa. Iti Lucas 22 kunana: "Aramidenyo daytoy a panglaglagipyo kaniak" (v.19b). Kastoy met laeng ti kuna ti Umuna a Corinto 11. Namindua pay a naulit daytoy (vv. 24, 25.) Wen, ar-aramidentayo ti Sakramento ti Kumunion kas panglaglagiptayo ken ni Jesu-Cristo.

Addatayo ita iti krisis gapu ken ni COVID 19. Saan laeng a ditoy Filipinas ngem iti intero a lubong. Adun ti pimmusay. Adun ti naospital. Gapu iti Enhanced Community Quarantine, adu dagiti umili a nakadepende iti tulong manipud iti gobierno ken iti pribado a sector. Nupay adun dagiti addang nga irusrusuat dagiti nagduduma nga ahensia ti gobiernotayo, kaskasdi nga addada latta maipadpadamag a biktima ni COVID-19. Kunada nga aginga ita, awan pay ti napartuat nga agas a mangpaksiat iti daytoy a virus.

Gapu iti daytoy a kasasaadtayo ita, emosional dagiti tao a kas kadagiti Adalan iti daydi a rabii nga inda panaglalanglang a kaduada ni Jesus. Gapu kadagiti mapaspasamak ita, addada dagiti umili madandanagan, mabutbuteng, maladladingitan, marirribukan, makaung-unget ken dadduma pay.

Ita. Intay' laglagipen ni Jesus kas aglalalanglangtayo nga ag-komunion. Adu dagiti rumbeng nga intayo laglagipen maipapan kenkuana. Nupay kasta, isingasingko man nga ti intay' ita laglagipen ket iti panggep ti iyuumayna ditoy lubong ken no ania ti inaramidna tapno maibanag ti nakuna a panggep.

Ni Jesus ket immay ditoy lubong tapno maaddaantayo iti biag, biag nga awan pagkurkuranganna (Juan 10:10b). Ammotayo kakabsat nga iti agdama, ti biagtayo ket adu ti pagkurkuranganna. Adu dagiti kakabsattayo nga agkurkurang ti taraon, trabaho, pannakaagas, pannangipateg, pagbiagan ken dadduma pay. Wen, masansan nga agkurkurangtayo ti panagkikinnaawatan, panagkaykaysa, panagpipinnakawan ken panagtitinnulong. Wen, adda dagiti situasion nga agkurkurangtayo iti kinapakumbaba, kinaanus, kinamanagsakripisio ken regta nga agserbi. Pudno nga adu dagiti pagkurkurangantayo.

Mismo a ni Jesus ket impakitana kadatayo ti kongkreto nga aramid tapno maaddaantayo iti biag nga awan pagkurkuranganna. Daytoy ket isu iti inna panangibiag iti katan-okan nga ayat – isu't panangited ti biag para iti pada a tao (Juan 15:12-13). Saanna laeng nga insuro daytoy. Mismo nga inaramidna.

CONCLUSION:

Kas namati, ti reperensiatayo iti panagbiag ket awan sabali no saan a ni Jesus kas isuna ti dalan, ti kinapudno ken ti biag (Juan 14:6). Agingana a saantayo nga ibiag ti wagas ti panagbiag nga impakita ken insurona, saantayonto a maaddaan iti biag nga awan pagkurkuranganna.

Aginga a saantayo a kabaelan nga ibingay ti biagtayo para kadagiti sabsabali, adunto latta ti pagkurkurangan ti biagtayo.

Kas intay' laglagipen ita ni Jesus babaen iti panagkumuniontayo, lagipentayo met dagiti adu a kakailian a frontliners nga nangibingay ken agtultuloy a mangibingbingay ti biagda para kadagiti adu nga umili. Mairaman ditoy dagiti pimmusayen a mangngagas, dagiti nakaptan iti coronavirus gapu iti panagserbida ken uray pay dagiti agtultuloy nga agserserbi kadatayo agingana ita.

Wen, kas intay' laglagipen ita ni Jesus babaen iti panagkumuniontayo, sungbatantayo man daytoy a saludsod: "Ania met ti adda kaniak a mabalinko nga ibingay tapno makapasetak met iti mission ni Jesus nga isu ti pannakapaadda ti biag nga awan pagkurkuranganna?"

Iti nagan ti Ama, Anak, ken Espiritu Santo, AMEN!